

مسرحية

عنبر 10

تأليف وإخراج

يوسف محمد (مومو)

المشهد الثاني

يحيي : يا مدام عفاف الدكتور خالد مأكدلي ان العنبر ده هادي والحالات اللي هنا هادية وانا كاتب ومحتاج تركيز علشان اعرف اطلع تفاصيل انسانية مش دوشة وخناق يعني

عفاف : الدكتور خالد صاحبك بيشفوفهم حالات انا بشوفهم دوشة .. تحب نغير العنبر

يحيي : لا انا بثق في اختيارات دكتور خالد

عفاف : مفيش حد هنا هادي يا استاذ يحيي الهدوء بره (دوشة من المرضي) هنا كل واحد جواه بركان بينفجر في وش الثاني (تصرخ في المرضي) باللاس كفاية دوشة كله يرجع مكانه معايا ضيف جديد .. اتفضل يا استاذ يحيي

سيف : ياجدعان الضيف الجديد وصل يوتيوبر جديد انضم للعصابة قولني بقا عندك كام متابع ؟ طب تفكر لو صورنا تحدي الاكل بعلبتين الدوا بتوع الظهر الريتش هيعلي ؟

مرعي : ارجع ورا يبني انت .. اوراق هويتك يا عسكري .. انت تبع فرقة اي ؟ ومين سمحك تخترق خط الدفاع الاول من غير كلمة السر ؟؟ انطق .. بقولك انطق .. انا كده هتعبرك جاسوس وانفذ فيك حكم ميداني حالا

عبده : سيبك منه ده بيخرف .. قولني بقا القميص اللي انت لابسه ده بكام والمتر فيه ياخذ كام غرزة احسبها كده لو المصنع فيه ميت عامل وكل عامل ضيع غرزة بيقوا كام غرزة ضايعة ف اليوم .. الحساب بالايظ للاسف مبيظبطش يا فندي هما بيسرقوا الغرز من القماش اصلا

يحيي : يا جماعه ممكن تهدوا شوية .. انا مش جاسوس ولا يوتيوبر انا مؤلف .. كاتب

فاتن : (تجري علي يحيي) كالتب !! ياروحي .. اخيرا المنتج بعثلي يكتبلي السيناريو الجديد بس بشرط يا استاذ يحيي انا اللي اتحكم في الكادر وانا اللي اختار البطل والبنت صباح دي متطلعش في الفيلم خالص وشها نحس علي الكاميرا

صباح : انا اللي نحس ياكومبارس يا عانس انا بنتي دي بطلة بكره هتكبر وتبقي احسن منك انتي عاوزة تخطفيها وتبيعيها للمخرجين

يحيي : يامدام عفاف قولني حاجه انا كده مش هعرف اكتب كلمة واحدة

المستشار نبيل : سكوووت المحكمة في انعقاد (ليحيي) انت جاي بشنطة و ورق وقلم جاي تدور علي
ثغرة في القضية ولا جاي علشان تثبت التهمة علينا وخلص ؟

يحيي : تهمة اي يا باشا بس انا هنا علشان اسمعكم علشان افهمكم

عاصم : (ضحكة سخرية) يفهنا ؟ هيهات ! الفهم ده للي زيك يبني احنا هنا عدينا مرحلة الفهم احنا بقينا
المعني نفسه انت جاي تدور علي قصة تبيعها للناس وتتشهر واحنا جايين نهرب من قصصنا اللي دمرتنا
(يشاور علي يحيي) بص لعينه يا نبيل ده مش كاتب ده خايف ريحه الخوف فيه اقوي من ريحه الحبر

ورد : هتقولهم اني عاوز اهم في موضوع مهم ولا مش هتعرف زي الباقي بس خلي بالك انت لازم تعلي
صوتك علي الاخر علشان هما سمعهم تقيل حبتين

جميلة : قولوا اني بقيت بكرهه اوي ومهما حاول انه يوصلني انا مش عاوزة اشوفه

صباح : انا بس محتارة اعملها ضفيرة واحدة ولا 10 قولي انت كده اعمل قد اي

غريب : (بيقرب من يحيي بيلمس بدلتة) البدلة دي غريبة الاسم اللي مكتوب عليها وعلي الكارنيه بتاعك
كمان غريب تفتكر لو بدلت اسمي باسمك هعرف اخرج من هنا هعرف اخرج من الباب اللي وراك ده ؟

يحيي : مدام عفاف .. انتي روحتي فين .. افتحيلي الباب ده عاوز اتكلم معاكي دقيقة واحدة

ليلي : (مش هتفتح .. اللي بيدخل هنا يا مؤلف بيبقي جزء من الحكاية ومحدث بيخرج من حكايته قبل ما
يخلصها حتي لو نهايتها موت

المشهد الثالث

يحيي : سيادة المستشار انا سمعت انك كنت ميزان العدالة في المحكمة الكلية اي اللي جاب الميزان هنا وسط الناس دي

المستشار نبيل : العدل نور يبني والنور هنا شديد اوي علي عيني انا جيت هنا عشان اغض عيني وارتاح من الوشوش

يحيي : الوشوش؟؟ وشوش مين المتهمين ؟

المستشار نبيل : وش واحد بس كان بيطلعلي في وسط كل قضية كان بيقف هناك (يشير) كان لابس هدوم مبهدة وريحته تراب وعرق كان بيصرخ من غير صوت وبيقولي انا مظلوم يا سيادة القاضي انا كنت عارف انه مظلوم بس كنت معمي حبي لبنتي خلاني افكر غلط خلاني استغل سلطتي

صباح : يا بابا، الحب مش جريمة عشان تعاقبني عليها. هو إنسان شريف، بيبنى نفسه من الصفر ليه الإصرار على انك تدمره ؟

نبيل : الشرف يا مريم يا بنتي مش بس كلمة الشرف مكانة أصل وسقف يحمينا والولد ده سقفه واطي مش هيقدر يشيل اسم عيلة المستشار نبيل

صباح : هو مش عاوز يشيل اسمك، هو عاوزني أنا! أنا اللي هعيش معاه، مش طقم النيش ولا الألقاب

نبيل : الألقاب هي اللي خلتك مريم هانم الألقاب هي اللي خلتك في الوضع اللي انتي فيه دلوقتي انا عاوزك تفهمي الفقر يا بنتي بياكل الحب زي ما السوس بياكل الخشب أنا بحميكي من غباء اختيارك

صباح : بابا انا بعرفك لو ضاع مني .. أنا كمان هضيع منك بلاش تستخدم سلطتك في كسر قلبي

نبيل : السلطة اتوجدت عشان تحط كل واحد في مكانه الصح.. ومكانه مش جنبك اطلعي بره يا ليلي الموضوع انتهى

صباح : ارجوك يا بابا متضيعش مستقبلك وتحرميني منه

نبيل : أنا هعمل الصح هعمل اللي يحمي اسم العيله و يحميكي من دماغك

صباح : خليك فاكر يا بابا لو حرمتني منه أنا هموت نفسي وهتعيش طول عمرك شايل ذنبي وذنوب واحد معملش حاجه غير انه حب بنت المستشار نبيل

نبيل : (ليحيي) جمدت قلبي ومخوفتش من اي قرار كانت ممكن تاخده نسيت انها عنيدة ما هي طالعلي دماغها ناشفة

يحيي : وحبسته يا نبيل ؟

نبيل : اللي الحصل بعد كده كان اصعب بكتير يا يحيي اصعب من اللي كان ممكن خيالي يجيبه انا حكمت عليه بالسجن خمسة وعشرين سنة بتهمة التخابر وحيازة مواد ممنوعة بقصد الإضرار بالأمن القومي وبعدها رocht بيتي وانا فاكر ان خسرت ضميري المهني لكن كسبت بنتي واسم عيله عيشت سنين اعمل فيه .. لقيت بنتي مرميه ع الارض سايحه ف دمها بتموت وبتودعني بكلمه انت ظلمتنا يا سياده المستشار وماتت لا لا قومي يامريم قومي بلاش هزار .. مريم.. ردي عليا أنا بابا.. أنا المستشار اللي الدنيا بتعمله ألف حساب أنا اللي لغيت وجوده بكلمة من قلبي معقولة مش قادر أرجعك بكلمة أنا محبستوش عشان بكرهك.. أنا حبسته عشان ميكسرش نفسك .. عشان تفضلي بنت القاضي العالية.. مش مرات الشحات قومي يا مريم عشان خاطري انتي مينفعش تموتي .. خلاص انا موافق عليه خلاص انا هديله براءة وفرحكوا الاسبوع اللي جاي يلا .. يلا يامريم قومي بقا عشان تقوليلي لون بدلتى هيكون اي يلا يا مريم

ليلى : الظلم يا يحيي اصعب حاجه انك تتعرض للظلم والاصعب انه يكون من اللي منك

يحيي : ازاي قاضي يظلم ده انا قولت اكيد هو اكرت واحد هنا هيفهم طبيعه مهمتي .. انا يحيي مؤلف وبحاول اوثق .

المستشار نبيل : (مقاطعا) التوثيق امانه يبني والقلم في ايد صاحبه زي السيف يا اما يقطع رقبة الظلم يا اما يدبح الحقيقة انت قلمك من انهي نوع ؟

يحيي : انا قلبي بيدور علي الانسان .. علي الانسانية بدور علي الحقيقة اللي اكيد لازم تطلع للنور

المستشار نبيل : قولتلك اوقات النور بيكون اقوي من اننا نشوفه

يحيي : (للاسطي عبده) مش دايم .. الحقيقة لازم تبقي واضحه زي مثلا واحد زائد واحد بيساوي اثنين دي حقايق ثابتة و واضحه

الاسطي عبده : واحد ذائد واحد يساوي كام ؟؟

يحيي : اثنين !!

الاسطي عبده : غلط .. بيساوي صفر دي الحسبة اللي بتطلعي كل مره مع ان المفروض النتيجة الصح تبقى اتنين بس كل مره بحسبها بتطلع صفر

ليلي : يحيي .. متتعيش نفسك كتير احنا هنا مرايات يا يحيي كل واحد فينا شايل حته من حكاية الثاني المهم بقا انت .. انت مرايتك هتبين اي لما يبجي عليها الدور

يحيي : من ساعت ما جيت هنا وهو بيحسب الحسبة دي قاعد يعد في صوابع ايده اي اللي شغال فماغه ليلي : عبده بيحاول يحل المعادلة الصفرية بيحاول يحسب هو ضاع منه كام عمر في المشاوير اللي مبتوصلش

الاسطي عبده: (يصرخ فجأة) غلغللغلل في قرش ناقص لو الورشة فيها عشر مكناات وكل مكنة بتطلع ميت قميص والقميص في سبع زراير يبقي صاحب المصنع سرق مني كام ثانيه ف عمري

سيف : ها يا عبده خلصت الحسابات ولا لسه الاوردر ده لازم يطلع الفجر وابويا مش هيستني فهلوي زيك يضيع علينا الصفقة دي

الاسطي عبده : يا علي بيه المكن قديم والابر بتقطم والعمال كمان مخدوش اضافي من شهرين الحسبة كدة مابتطلعش قماش بتطلع خسارة

سيف : (بسخرية وينظر ليحيي) انت لسه هترغي شفت الاستاذة دي يا عبده دي المحاسبة الجديدة اللي ابويا جابها علشان تراجع وراك قوليلوا يا استاذة الحساب كام ؟

وردة : انا لسه مستلمتش الحسابات يا استاذ علي واكيد مليانه غلطات بس اوعذك اني هحسبها صح واقولك كل كبيرة وصغيرة .. هقولك علي كل حاجة

الاسطي عبده : (مقاطعا) قوليلوا يا استاذة قوليلوا ان لما الواحد ينقص منه كرامته الناتج بيكون في النهاية صفر و قوليلوا كمان انهم خصموا مني تمن الابر اللي اتكسرت من عمري اللي اتكسرت من شقايا وتعبي ومرمطي احسبها يا استاذة احسبها يا متعلمة انا اشتغلت 20 سنة احسبها بقا كام يوم؟؟ ولا كام ساعه؟؟ ولا يبقوا كام ذل وكام اهانة انتوا بتظلموني علشان مصالح شخصية انا مليش اي ذنب فيها .. اي ذنبي انا انك عاوز تجيب خطبتك مكاني .. اي ذنب ولادي في ظلمكوا ليا قصرت معاكوا في اي علشان تقررروا تموتوني وانا لسه عايش انا مينفعش اسيب شغلي حرام عليكموا مينفعش مش هلاقي اجيب اكل لعيالي مش هعرف اعيش مش هعرف

سيف : عبده انت مطرود ومفيش مكافأة نهاية الخدمة كمان لانك للاسف حسبتها غلط زي كل مره

عبدہ : لا لا يا علي بيه حقك عليا انا هعدهم تاني من الاول وهتظبط المره دي ان شاء الله .. واحد اتنين
تلاته .. الحساب مبيظبطش مفيش فايدة الحساب دايمًا بيطلع غلط بيطلع موت في النهاية

ليلي : ها يا مؤلف .. عرفت تحسبها

يحيي : هو اي اللي حصل هو انا ليه دخلت معاهم الحدوته انا المفروض بكتب بس

ليلي : الورق بتاعك ده اللي بتكتب فيه ده فخ كل ما تكتب كلمة بتغرق في حبرهم اكثر ياتري الدور جاي
علي مين العسكري ولا الام اللي مستنية بنتها اللي تاهت في الحسبة ولا البت اللي ملهاش علاقة بغباء
امها وابوها (صوت خبط علي الباب الجميع يقف باهتمام مبالغ فيه)

يحيي : في اي يا ليلي انتوا قومتموا وقفتوا كلكوا كده ليه هو فيه اي واي الصوت ده

ليلي : الممرضه عفاف جايه والصوت ده معناه ان فيه زيارة لحد .. بقالنا سنين مسمعناش الصوت ده

عفاف : اقعدوا مكانكوا .. كل واحد في مكانه .. يحيي .. جهز نفسك جايلك زيارة

الجميع : يحيي ؟؟؟؟

اظلام

المشهد الرابع

خالد : يحيي .. انا مش بكلمك دلوقتي كصديق انا بتكلم معاك دلوقتي ك دكتور انت بقالك هنا 48 ساعه .. ملامحك اتغيرت يا يحيي .. نبرة صوتك كمان اتغيرت بقت مشروخه .. الحكايتين اللي كتبتهم عن القاضي والمحاسب انا قريتهم ف عينك قبل ما اقراهم في كشكولك .. انت بتستنزف في روحك يا يحيي

يحيي : الاستنزاف ده عامل زي الولاده كده يا خالد ! انت دكتور وبتحكم بالتحاليل والاشاعات انا بقا مؤلف وبحكم بالنبض انا اول مره احس اني حي اني مش بكتب حبر علي ورق انا اول مره ابقي متأكد اني بكتب بدمي وسط ناس حقيقيين

عفاف : انت بتسمي اللي هنا حقيقيين دول بقايا بني ادمين يا استاذ يحيي الواحد منهم بيدخل هنا عشان يهرب من حقيقته وانت جاي تدور عليها وسطيهم .. انت عارف يعني اي عنبر 10؟ ده العنبر اللي ملوش قرار اللي بيغرق فيه مبيطلعش جثة بيطلع خيال

خالد : عفاف عندها حق يا يحيي .. انا مش جاي زيارة انا جاي اخذك ونمشي من هنا .. الرواية اللي انت جاي تكتبها هنا مش اهم من عقلك .. لما جيت وقولتلي انك عاوز تعمل معاشة علشان تعمل رواية تكسر الدنيا انا معترضتش لاني عارف انت هتعمل اي بالظبط لكن من الواضح كده ان الموضوع بيتطور تطور مخيف .. يا يحيي العالم بره محتاجك عاقل مش محتاج راوي محطم .. تعالي معايا دلوقتي (فجأة تظهر ليلي في الخلف)

ليلى : متسمعش صوت الالات يا يحيي .. هما عاوزينك تبقي ترس عاوزينك تنسي

انك شفت الوجع الملكي الوجع الساكن جوانا وساكن في عيون كل المرضى ..

لو مشيت دلوقتي الحكايات دي هتموت وهتفضل انت مجرد كاتب تقرير .. فاشل

يحيي : انا مش فاشل .. انا مش مجرد كاتب تقارير انا مؤلف .. وكاتب حقايق محدش يعرف عنها حاجه

خالد : انت بتكلم مين يا يحيي انا بكلمك انت بص ف عيني

عفاف : شفت يا دكتور مش قولتلك الانفصال عن الواقع اول مسمار في نعش العقل (ليحيي) ابعد عن الخيال اللي في دماغك الخيال هنا سم مش الهام يا مؤلف

ليلي : (تقترب من يحيي) انا الصدق اللي هما خايفين منه انا اللي هخلي قلمك ينطق باللي عجزت سنين عن نطقه .. كمل يا يحيي لسه فيه مرعي لسه فيه صباح لسه في ضلمة كبيرة اوي مستنيك تنورها .. وانا هكون معاك انا دليلك في الضلمة دي

خالد : يحيي ده اخر انذار ليك لو مخرجتش معايا دلوقتي انا هسحب ضمانتي ليك وهبلغ الادارة انك بقيت مجرد حالة محتاجة جز الزامي مش معاشة والله اعلم بقا هتقدر تخرج من هنا امنا ولا مش هتخرج اصلا

يحيي : انت بتقول اي ياخالد انا عمري ما كنت حر زي اما انا هنا

عفاف : لو كنت حر فعلا ارمي الكشكول ده واخرج من الباب

ليلي : لو رميت الكشكول هترمي روحك اطردهم يا يحيي اطردهم من مملكتك

يحيي : مدام عفاف ! دكتور خالد ! الزيارة انتهت (يتركهم ويذهب الي ليلي)

خالد : انت بتقول اي ؟

عفاف : انت متأكد ؟

يحيي : الزيارة انتهت انا مش هخرج واي محاولة اخراجي بالقوة هعتبرها محاولة لاغتيال علمي الادبي انا هنا ف بيتي وسط اهلي ناس فاهمهم وفاهمني

عفاف : اهلك ؟ مبروك يا استاذ انت كده قطعت التذكرة .. ذهاب بلا عودة ..

خالد : يحيي متعلمش كده ف نفسك

عفاف : لو سمحت يا دكتور الزيارة انتهت عن اذنك (يخرجون)

ليلي : (بصوت ملائكي) برفو يا يحيي .. دلوقتي بس .. نقدر نبدأ الحكاية بجد

استعراض ديو بين يحيي وليلي

(تنزل اغنية ضمة - ياسمينا العبد)

اظلام

المشهد الخامس

يحيي : انا مش شايف الاسامي انا شايف خنادق .. وشوش محروقة

ليلي : (تهمس) متدورش علي الاسامي يا يحيي دور علي الرصاصة اللي ساكنة في حيطان العنبر .. الحقيقة مش اللي بتشوفه عينك الحقيقة هي الشرخ اللي في روحهم اسمع صوت الشرخ وهو بيكبر وانت هتفهم (تتحرك يظهر مرعي)

مرعي : مش دايم بنكون صح في قراراتنا رغم انها بتكون قرارات صح بس وقتها غير مناسب (فجأة صوت صافرة الغارة وضرب نار كثيف وحركات عشوائية)

مرعي : اثبت يا عسكري منك له .. المدد جاي اثبت منك ليه (يمسك لاسلكي وهمي) يافندم العساكر بتخلصص مني العساكر ولادي بيموتوا قدامي انسحب يافندم .. تمام يافندم ممنوع الانسحاب علم وينفذ غريب : احنا بنخلص لازم ننسحب يافندم

مرعي : (باتكسار) ممنوع الانسحاب مفيش خروج الاوامر بتقول نفضل هنا

سيف : ياصول مرعي الكلمة الاولى والاخيرة دلوقتي ليك انت انت عارف اننا لازم ننسحب ولو معملناش كده هنموت كلنا ارجوك يافندم

غريب : اسمع صوت نفسك واكسر الاوامر مرة واحدة

مرعي : مفيش اوامر هتتكسر نفضل هنا يعني نفضل هنا كل واحد علي مكانه (يتحرك سيف وغريب الي بؤرة اضاءة ثم صوت انفجار والبؤرة تتحول احمر ويسقطون ارضا)

مرعي : انا السبب كان ممكن اكسر الاوامر اه كنت هتعاقب بس مكنش حد مات بسببي .. اول علي الاقل كنت روحت معاهم اهو كان زماني ميت كان زماني معاهم ومكنتش هفضل عايش بذنبهم طول عمري .. انا كنت غلط ؟ لا انا كنت صح انا سمعت الاوامر اللي بتمشي علينا كلنا انا كنت صح ف تنفيذ الاوامر بس مكنتش صح اني سيبتهم يموتوا كلهم ماتوا وانا اللي عيشت .. عشت علشان اسمع صوتهم كل ليله وهما بيسألوني .. ليه مموتش معانا لما احنا معشناش معاك

يحيي : بس انت ملكش ذنب انت لو عليك كنت ...

مرعي : (مقاطعا) تمام يا فندم .. اثبت مكانك كل واحد معاه سلاحه محدش يخلص الذخير ه اهو يعني
علشان لو جوعنا ولا حاجة جوعنا نلاقي حاجة ناكلها

ليلي : اصعب انواع القتل يا يحيي هو انك تقتل اللي بتحبهم علشان كلمة .. كلمة انت اصلا مش مؤمن
بيها في نفس الوقت اللي قولتها فيه بس مجبر تنفذها

يحيي : بس هو كان فاكرا انه بيحبهم .. مرعي ضحية الولاء

ليلي : الولاء لما بيزيد عن حده بيبقي حبل مشنقة مرعي محبوس في اللحظة اللي قال فيها تمام يافندم

يحيي : هي صباح لي واقفة كده وكأنها مستنية حد جاي دلوقتي حالا

ليلي : صباح مش مستنية حد يا يحيي .. صباح بتبص للزمن هي محبوسة في الثانية اللي اختها خرجت
فيها ومرجعتش

صباح : روح بت يا روح

جميلة : ايوة يا ماما

صباح : خدي بيت العشرين جنيه دي وانزلي هاتي عيش من الفرنه تحت

جميلة : يوووه حاضر يا ماما

صباح : هو انتي بيت مينفعش تعملي حاجة من غير ما تقولي يوه دي

جميلة : يوووه لا

صباح : لمضه بس واخدة كل قلبي بيت انتي

جميلة : مسميش بت علي فكرة

صباح : حاضر يا انسه روح اسفة يا استاذة روح

جميلة : ايوة كده وعلي فكرة انا كبيرة ومش صغيرة ومش تافهة

صباح : متأكدة يعني انك مش صغيرة ؟

جميلة : ايوة طبعا مش صغيرة

صباح : اممم طيب خلاص .. حيث كده بقا بما انك بقيتي كبيرة ومش صغيرة اشوف بنت صغيرة اديلها عروسة العيد اللي انا جبتها لك اصل انا كنت فاكره انك لسه صغيرة يعني

جميلة : ماما انتي بتتكلمي بجد ؟

صباح : هتروحي تجيبي العيش ولا لأ بيت انتي

جميلة : حالا

صباح : بس ترجعي بسرعه علشان اوريكي عروسة العيد اللي جبتها لك

جميلة : ماما متهزريش : انتي جبتي العروسة بجد ؟؟

صباح : هو انا اقدر اشوفك نفسك في حاجه ومجبتهاش .. ده انتي بنتي مش اختي يا روح .. من وقت ما امنا الله يرحمها ماتت وانت حنة لحمه حمرا وانا قررت ان حياتي كلها هتبقى ليكي انتي .. حياتي كلها هعيشها علشانك انتي وبس

جميلة : تعرفي .. انا عمري ما حسيت اني معنديش ام انتي مخلياني مش ناقصني اي حاجه خالص انا اصلا طول الوقت بقولك ياماما

صباح : وانا طول الوقت بشوفك بنتي

جميلة : ربنا يخليكي ليا ياماما

صباح : يلا بيت كفاية دلع وانزلي هاتي العيش

جميلة : طب ما توريني العروسة دلوقتي والنبي

صباح : لا لما تطلعي يلا بيت بلاش دلع

جميلة : يوووووه حاضر (تخرج)

صباح : خلي بالك من نفسك يابت (تعود علي السرير)

(بؤرة اضاءة عليها فقط والمسرح كله مظلم عدا منطقة صباح ويحيي وليلي)

ليلي : صباح امها ماتت بعد ما ولدت روح باسبوع .. اتعلقت بيها اوي وقررت ان حياتها كلها هتبقى لروح ومفيش اي حاجه هتشغلها عنها ولا ناس ولا جواز ولا الدنيا بحالها (صوت دوشة شارع عاليه ثم صوت اصطدام حادثة)

(تفتح اضاءة المسرح بالكامل نجد روح ميتة علي الارض وكل المرضي حولها)

صباح : روح .. رووووووح

(كل المرضي يقعون علي الارض في لحظة واحدة .. صباح تجري عليهم)

صباح : ينفع كده العيش اتوسخ تراب يابنتي العيش بقا ريحته دم قومي يا روح قومي علشان خاطري
الناس بتبص علينا يا حبيبتي قومي بالله عليك متموتيش

(المرضي يقوموا ويلفوا حواليتها وبيرددوا بصوت خافت)

الجميع : ماتت يا صباح .. ماتت يا صباح .. روح ماتت يا صباح

صباح : باللاس .. لا مماتش ! انتوا كدابين .. انتوا اللي مسحتوا ملامحها بالكاوتش بتاعكم قولهم يا يحيي
قولهم يا مؤلف انك شايف روح دلوقتي وهي بتاكل العيش وبتلعب بالعروسة الجديدة قولهم انها لسه
موجودة لسه حية في الكشكول بتاعك صح . مش هي لسه عايشه؟؟ روح لسه عايشه .. شوفتي
العروسة الجديدة بتاعتك .. قومي يلا نلعب بالعروسة يلا نلعب بالعروسة (هيسثيريا)

يحيي : انا مش قادر ياليلي الوجع ده حقيقي زيادة عن اللزوم انا حاسس بريحه الدم شاممها حالا

ليلي : الجنون هو درع الحماية يا يحيي صباح اختارت تتجنن علشان لو عقلت ثانيه واحده الحقيقة
هتقتلها هي فضلت مستنية روح علشان الانتظار ارحم من الدفن

يحيي : طب والناس اللي داست عليها ؟

ليلي : هما دول (تشاور علي المرضي) الزحمة الاستعجال الانانية كلنا دوسنا علي روح يا يحيي واحنا
بنجري علي اكل عيشنا

صباح : بكره العيد وروح هتجيب العيش وهتلبس الفستان وهتلعب بالعروسة .. بكره . بكره .. بكره العيد
(تكمل بصوت خافت)

يحيي : بكرة مش هيجي يا صباح بكره مات تحت الميكروباص (يقطع اوراق)

ليلي : الدور علي مين يا يحيي مين اللي حكايته هتخليك تقطع ورقك الجاي؟؟

(يذهب يحيي الي ركن ويده مراية)

يحيي : انا بقيت بشوفهم في المراية ياليلي ؟؟ مبقتش بشوف نفسي

ليلى : المراية مبتكدبش يا يحيي انت مبقتش واحد انت بقيت عنبر اتفرج اتفرج يا يحيي علي اللي باعوا ارواحهم علشان صورة واليوم اللي الصورة اتكسرت فيه .. الصورة دايم لما بنبص عليها بتبقي ثابتة ساكنه مبتتحركش انما المرايه هتحس فيها بروح بحركه انت اللي ب ايدك تختار تبص للصورة او المرايه

اظلام

المشهد السادس

يحيي : الموضوع بقا ثقيل عليا اوي يا ليلي بس في نفس الوقت مش قادر اقف مش قادر مكملش حاسس ان في حاجه دايم بتشدني مش عارف احدد مين ظالم ومين مظلوم

ليلي : مش دورك انك تحكم مين ظالم و مين مظلوم مش دورك تحكم اصلا قرب اكتر يا يحيي جايز تعرف اي هي الحاجه اللي مخلياك مكمل لحد هنا

يحيي : جايز الفضول !

ليلي : معتقدش ان الفضول هو السبب الاساسي .. عينك سرحانه فين يا يحيي

يحيي : بحاول اتوقع اي اللي ممكن يخلي طفلة زي دي يكون مكانها هنا .. اي اللي ممكن يكون حصل في حياتها يخليها تكون في المكان ده .. انتي اسمك ايه ؟

جميلة : انا اسمي جميلة

يحيي : مبسوطه هنا يا جميلة

جميلة : انا مستنيا ماما تيجي تاخدني من هنا .. هو قالي كده

يحيي : هو مين ؟

جميلة : (تتذكر شيئا ما) انا .. انا مش عاوزة افكره .. انا بقيت بكرهه اوي .. رغم اني كنت بحبه جدا

الأب: (بصوت منخفض وناعم) لسه صاحية يا جميلة؟ أنا قولت زمانك نمت من بدري

جميلة: (تنتفض قليلاً، لا تنظر إليه) كنت.. كنت بحاول أذاكر يا بابا

الأب: (يقترّب، يجلس بجانبها على السرير) المذاكرة تتعبك.. وأنا مش عاوزك تتعبي. إنتي عارفة

غلاوتك عندي قد إيه؟ إنتي مش بس بنتي، إنتي حبيبتي

جميلة: (بصوت مخنوق) عارفة يا بابا.. شكرا

الأب: (يضع يده على كتفها، جميلة تتقلص لا إرادياً) خايفة مني؟ ده أنا بابا اللي كبرتك اللي كنت بشيلك

على كتافي وألف بيكي الدنيا. فاكدة لما كنتي بتخافي من الرعد وتيجي تستخبي في حضني؟

جميلة : فاكدة.. بس أنا كبرت دلوقتي

الاب : مفيش حد بيكبر على حضن أبوه.. ولا حد بيكبر على "أسرارنا". اللي بينا ده يا جميلة حب غالي
حب ميفهموش الناس اللي بره. إنتي بتثقي فيا، صح؟

جميلة : بابا انت بتعمل اي ؟ بابا شيل ايدك

الاب : اسمعي كلامي يا جميلة انا عاوز مصلحتك

جميلة : بابا متعملش فيا كده لا يابابا انا بحبك ونبي لا (تصرخ)

كان دايمًا بيقولي إني جميلة زي اسمي.. كنت بشوف الدنيا بعيونه هو الأب بالنسبة للبنات هو أول بطل
صح يا دكتور؟ كنت بستناه على الباب.. ريحة هدومه كانت هي الأمان لما كان بيحضني وأنا صغيرة كنت
بحس إن مفيش شر في العالم يقدر يوصلني.. (تصمت فجأة، وتتحول نبرة صوتها) مكنتش أعرف إن الشر
هو اللي بيحضني في لحظة.. الأمان اتقلب خوف. الإيد اللي كانت بتمسح دموعي لما أقع هي اللي خلتنني
أقع المرة دي.. بس الوقعة كانت صعبة أوي يا دكتور. مكنتش فاهمة.. كنت عاوزة أصرخ بس صوتي
ضاع في حضنه اللي فجأة بقى ثقيل.. ثقيل زي الحجر كان نفسي أقول لأ بس أقول لأ لمين؟ للراجل اللي
علمني أمشي؟ للراجل اللي شوفت الدنيا بعيونه أنا كنت ببص في عينه وأنا مش مصدقة.. كنت مستنية
بابا يظهر فجأة ويخلصني من الراجل ده بس بابا والراجل كانوا واحد أصعب حاجة مش الوجد يا دكتور..
أصعب حاجة إنك تضطر تكره أكثر حد كنت بتحبه.. وتخاف من أكثر مكان كنت بتطمئن فيه. أنا مش بس
خوفت واتوجعت لا انا اتكسرت.. بس انا بحب بابا ومستنياه يجي مع ماما ويأخدوني من هنا

ليلي : تقدر هنا بقا تقولي يا مؤلف هتحكم علي جميلة ازاي ؟

يحيي : مش لازم احكم يا ليلي كفاية حسيت وجعها كفاية اني من جوايا دلوقتي حاسس بيها

ليلي : جميلة ضحية زيها زي غيرها .. مكنش ليها ذنب في اي حاجه حصلت لها يمكن زيها زيك ؟
تفتكر انت كام مرة كنت مذنب وكام مرة كنت مظلوم ؟ الحقيقة واضحة قدامك يا يحيي بس انت اللي مش
عاوز تشوفها وانا قولتلك انا دليلك في الضلمه بس دورك انك انت اللي تشاور علي الحقيقة دورك انت
اللي تقول الحقيقة اهي .. جاهز تدور علي الحقيقة يا يحيي جاهز تكمل ولا خلاص عقلك مبقاش قادر
يشوف أكثر من كده ؟

اظلام

المشهد السابع

(تقف وردة في المنتصف ويمينها والدها ويسارها والدتها)

وردة : ماما .. ماما .. كنت عاوزة اقولك حاجة مهمة

فاتن : (تتحدث ف الهاتف) لا متهزريش .. طلبوا ب 100 ألف ذهب ليه يعني

وردة : ياماما انا حصلي مشكلة في المدرسة وعاوزة احكيك

فاتن : اصبري يا وردة (تكمل التلفون) لا قولي يا حبيبتي معاكى .. لا دي وردة مصدعاني كالعادة يعني

وردة : ياماما انا عمري ما صدعتك انا عمري ما اتكلمت معاكى اصلا

فاتن : (تصرخ) بت انتي هتصدعيني لبيبي ؟ عندك ابوكي اهو روجي قوليلوا كل اللي انتي عاوزاه

وردة : انا مش عاوزة بابا انا كنت عاوزاكي انتي عاوزة اترمي في حضنك انتي ياماما عاوزة احكيك
انتى زي اى بنت فى سننى بتجرى على حضن امها

فاتن : خلصتي رغي ؟ روجى لابوكى .. معاكى يا صفاء كملى قولتى هيكتبوا قايمه بكام بقا ؟

وردة : انا عارفة انها بتحبني من جواها بس هي دايم شايقة صاحبها اهم بتشوف مشاكل الناس كلها الا
مشاكلي انا .. بابا .. بابا .. يا بابا

عاصم : هو في اى ؟ هو انتى مش شيفانى بشتغل .. اى مفيش نظر خالص

وردة : اسفة يابابا .. بس انا كنت عاوزاك

عاصم : عاوزة اى ؟

وردة : هتسمعني بجد ؟

عاصم : وردة انجزي علشان مش فاضى

وردة : حاضر حاضر انا هقول كل حاجه بسرعه دلوقتي انا حصل معايا موقف في المدرسة وكنت عاوزة

عاصم : (مقاطعا) في المدرسة ؟

وردة : ايوة يا بابا ده حتى

عاصم (مقاطعا) : انا مالي انا ومال المدرسة مش مصاريك اتدفعت ؟

وردة : ايوة اتدفعت بس الموضوع مش مصاريك خالص

عاصم : يبقي مليش دعوة روعي لامك

وردة : ماما مش فاضية وقالتلي اجيلك

عاصم : مش فاضية لي ان شاء الله

وردة : بتكلم طنط صفاء ف التلفون

عاصم : صفاء ؟ برضو .. يا هانم .. انتي يا نهني هانم

فاتن : في اي ؟ صوتك عالي كده ليه .. عاوز اي

عاصم : انا كام مرة اتكلم معاك ف الموضوع ده أنا زهقت

فاتن : يا حازم بلاش خناق دلوقتي البنت واقفة

عاصم : نهني .. فكك بقا من حوار البت ده علشان بقا بايخ اوي

فاتن : هو انت مبتحسش ؟

عاصم : بطلي تدعي انك مثالية وخايفة علي البت وبتحبها

فاتن : بحبها اكتر منك انت اللي مبتحسش

عاصم : وهو انتي لو كنتي بتحبها يا هانم كنتي اهملتي فيها ؟ علي الاقل كنتي هتركزي معاها بدل

الخروجات والشوبينج والكوافير ليل نهار مع شلة النادي

وردة : ماما انا عاوزة اتكلم معاك ممكن

فاتن : لا لو هتتكلم بقا يبقي انا كمان هتكلم هو مش حضرتك برضو كلموك في المدرسة علشان تروح تشوف بنتك بتعيط ومنهارة ليه .. ولما عرفت ان واحدة زميلتها ضربتها قولت مش هتروح ودي مشاكل تافهة

وردة : بابا ممكن تسمعني انت طيب

عاصم : وهو انا برضو اللي بنتي كانت محتاجه انك تقعد معاها في عز تعبها

ومحتاجه لحضن امها .. رايحه تجيبها خدامه علشان تعرفي تنزلي تتسرمحي مع شلتك البايضة

فاتن : احترم نفسك وانت بتتكلم معايا انت نسيت نفسك ولا ايه

عاصم : نهى .. انتي اتجنتتي .. انا مش عارف انا مستحملك علي اي اصلا

فاتن : دي عيشة بقت تقرف انا سيبيهاك وماشية يا حبيبي وخليك بنتك اشبع بيها

عاصم : بنتي .. ليه هي بنتي لوحدي .. هتمشي تاخدي بنتك معاكي ومش عاوز اشوف وشكوا تاني

فاتن : انا اللي مش عاوزا كوا تاني في حياتي انا زهقت منك ومنها

عاصم : انا اللي زهقت منك ومنها

وردة : بالاس كفايه .. ارجوكم كفايه (الاب والام بيتخانقوا مايم)

وردة : انا اللي تعبت منكموا بجد . انا اللي مش لاقية معاكموا ابسط حقوقي مش لاقية الامان مبقتش عارفة

اتكلم مع حد فيكوا ف بقيت دايمما بتكلم معاكي انتي يا دودو عارفة يادودو انا قررت العب معاها لعبة

جديدة هما يبجوها اوي اسمها لعبة النسيان .. بابا بيكسب فيها كل يوم لما بينسي ميعاد مدرستي و ماما بتطلع الاولي لما بتنسي اني لسه مكلتش طول النهار علشان هي مشغولة بالمكالمة المهمة .. انا النهاردة

صرخت باعلی صوت غندي صرخت جامد اوي وانا بقول .. انا هنا بصو علیا انا هنا بصو علیا انا هنا

بس هما كانوا بيتخافوا صوتهم كان اعلى من صريخي بابا بيقولها انتي مهملة وهي تقوله انا ضيعت

عمري بسببك ... طب وانا ؟ انا روحت فين في النص ؟ عارف يا بابا انا لما كنت بتعب واسخن كنت بفرح

اوي كنت بفرح علشان دي المره الوحيده اللي كنت تسيب فيها ورق الشغل وتلمس راسي وتلمس شعري

كنت بحس ان السخونية هدية من ربنا علشان بتخليني احسك .. وانتي ياماما لما كنت بشم ريحتك وانتي

خارجہ کنت بتخفق اوي .. الريحہ دي بتخفقتي علشان معناها انك خارجہ وسيبالي الدادۃ او التلفزيون ..

التلفزيون ده اللي رباني يا ماما هو اللي كان بيقولي تصبحي علي خير .. كان بيقولها لي اكرت منك .. انا

مش محتاجه لعب جديدة ولا محتاجه موبايل احسن موديل .. انا محتاجه عين .. عين تبص في عيني

وتسألني انتي كويسة ؟ محتاجه حد يسمعي وانا بحكي عن النملة اللي شوفتها في الجنية مش يقولي

مش فاضى يا وردة يلا الدخلى اوضتك انا بقيت خايفة اوي .. خايفة بييجى يوم واصحى الاقى نفسى

اختفت بجد .. الاقي المراه مش شايفه حد علشان محدش فيكم فكر يظن عليا ف بقيت هوا .. مبتوش

تعملوا حاجة غير الخناق و كل يوم .. كل يوم صوتكوا بيعلى اكثر من اليوم اللي قبله

فاتن : وانت فاكرنى هخاف من السكنة اللى ف ايدك دي ولا ايه

عاصم : انتي لازم تموتي وانا هقتلك

فاتن : انت اللي مينفعش تعيش يوم ثاني زيادة (يقترب عاصم من فاتن يطعنها وهي تمسكوا من رقبتوا)
(صريخ وهيستريا من وردة وكلمات انهيار حتي تصل للجنون)

ليلي : مصدوم يا يحيي ولا ايه ؟

يحيي : انا تعبت يا ليلي .. كل ما اقول مش هلاقي حاجه اصعب من كده اكتشف ان الاصعب والاثقل لسه مجاش

ليلي : وردة كانت ضحية اهمال اتصدمت لما شافت اكثر اتنين بتحبهم بيعملوا كده قدامها مستوعبتش انها ممكن تشوف منظر زي ده .. صورة هتفضل قدامها هتفضل تشوفهم في كل مرآة تبص فيها علي نفسها

يحيي : يعني مرايتها هتفضل طول عمرها مكسورة ؟ مفيش احتمال انها تتصلح ؟

ليلي : انت الوحيد اللي تقدر تجاوب علي السؤال ده .. في حاجه بتتكسر بتتصلح ؟

سيف : ركزوا معايا بقولكوا ركزوا معايا ياجماعه احنا داخليين علي 10 مليون التحدي اللي جاي مرعب تفتكروا هعمل اي؟؟ هولع ف هدومي ف اللايف .. ايوه زي ما سمعتوا بالظبط هولع ف هدومي ف اللايف وعلشان ازود التحدي صعوبة هرمي نفسي من البلكونة كمان يلا شير اكسلور خلوني اعيش يحيي : اي ده ؟ انت كنت مهندس محترم اي اللي وصلك لكده

سيف : المهندس مات يا مؤلف دلوقتي انا سيف تريند اشهر واحد علي التيك توك والسوشيال ميديا كلها .. بس هما طلبوا مني اكثر المتابعين عاوزين دم كنت لايف وعملت زي ما كانوا عاوزين بالظبط ولعت ف نفسي امي كانت بتجري ورايا في الشقه .. رمت نفسها ورايا انا عيشت بس هي ماتت انا كنت بصور كل حاجه وموقفتش تصوير علشان الكادر يفضل شغال والمشهدات تزيد اكثر واكثر فضلت اصور لحد ما نفسها طلع والناس كانت بتبعت قلوب قلوب كتير اوي وهي بتموت .. انا انا انا قتلتها .. لا انا مقتلتهاش . انا بس كنت عاوز التريند كنت عاوز ابقى اشهر واحد مكنتش عارف انا بعمل ايه مفيش تركيز .. الجري ورا الشهرة والتريند خلي قلبي بيبقي حجر حتي علي امي .. امي اللي بتمني لو الزمن يرجع بيا دقيقة واحد ده دقيقة واحده بس وانا اترمي تحت رجلها .. مش عاوز فلوس مش عاوز شهرة مش عاوز تريند انا عاوز حضن امي وبس حضن امي يا يحيي

فاتن : اهدي يا سيف يا حبيبي اهدي متعملش ف نفسك كده

سيف : انتي مين

فاتن : مش مهم انا مين المهم اني معاك اهدي متعملش في نفسك كده

سيف : اه انا عرفتك .. دلوقتي معانا ومعاكم الفنانة الكومبارس الفنانة المشهورة جدا اللي محدش يعرفها خالص

فاتن : فاتن : انا كومبارس يا حيوان ده انا نجمه .. يا استاذ يحيي انا كنت طول عمري نجمه انا فاتن اللي كان المخرجين بياخدوا الدور من النجمة ويديهولي يا دكتور عاصم قولهم ان اسمي كان بيتكتب بالذهب علي الافيش

د عاصم : اقولهم اي يا فاتن انتي كنتي دوبلير.. كومبارس صامت بقالك 20 سنة

فاتن : كذاب انت راجل كذاب (تمثل مشهدا) السم لم يكن في الكاس السم كان في تصفيقكم الكاذب اخرجوا من قاعتي اتركوا لي صمتي الاخير اتركوا لي كل ذكرى جميلة اتركوا لي حلمي الذي قضيت عمري بالكامل احلم به اتركوني وحدي ف من الممكن ان يتحقق الحلم هنا .. ف هنا قد يتحقق الحلم وهنا ايضا كانت ترقد فاتن التي عاشت الف حياة وماتت وحيدة في عنبر مغلق ..

مرعي : (بدور المخرج) استووووب .. اي يا فنانة اللي انتي بتعمليه ده انا عاوزك تكوني شباب عن كده عاوز طاقة عاوز باور

فاتن : يا استاذ سمير انا هعمل لحضرتك كل اللي انت عاوزه

مرعي : لا انا مش عاوزك اصلا انا قولت انك كبرتي خلاص .. شوفولي ممثلة شابة يا جماعه

فاتن : انا اسفه ممكن طيب نعيد تاني وانا هعمل كل اللي حضرتك تؤمرني بيه

مرعي : فاتن .. انتي كبرتي يا فاتن .. عجزتي .. وشك بان عليه العجز .. الجمهور بقا بيخاف يبصلك اصلا .. فوقى بقا من الخيال اللي انتي فيه ده

فاتن : كنت ف اللوكيشن لبست فستان والمخرج قال استوب قبل ما يقول اكشن .. فجأة النور طفي لقيتهم بيلموا البلاطوه بيشيلوا العده ناس رايحه وناس جايه قالولي انتي كبرتي يا فنانة وشك بيخوف العيال الصغيره .. تاني يوم لقيتهم مسحوا صورتى من الكارنيه شالو صورتى من البرواز.. الذهب اتحول بقا فضة حطوا مكاني بنت عندها 20 سنة مابتسلمش حتي علي حد بنت فرعه كده وحلوة شوفت نفسي فيها شوفت حلم حياتي والسعي سنين ورا سراب اتحول في الاخر لشوية تراب تراب ملوش معني بيداس عليه بالجزم انا ممثلة انا لازم اعيش في البلاطوه مكاني مش ف العنبر .. مكاني مش هنا يا استاذ يحيي

عاصم : لازم تتعالجي يافاتن بما اني دكتور بقولك لازم تتعالجي

يحيي : دكتور؟؟؟ دكتور وقاعد هنا .. طب ازاي

عاصم : الطب تجارة يا يحيي تجارة كنت فاكركه مكسب بس .. نسيت ان اي تجارة ف الدنيا بتكون خسارة ومكسب مش مكسب بس زي ما كنت فاكرك برغم اني كنت تاجر شاطر كنت تاجر اعضاء شاطر وشاطر جدا كمان مكنتش بعمل حساب لاي حاجه ولا لاي حد كنت شغال في كل حاجه كبار وصغيرين اطفال وشباب كان معايا ناس شغالة تحت ايدي كل يوم بيجبولى ضحية واتنين وتلاته وانا بقا اشوف المطلوب اي واخد اللي انا عاوزه وابيع والفلوس تكثر وتكثر لحد ما في يوم حصل اللي مكنتش اتوقعه ابدًا

غريب : عاصم بيه يا عاصم بيه

عاصم : ايوة يا شهاب خير

غريب : الوارد الجديد وصل

عاصم : اي التفاصيل

غريب : بنت صغيره عندها 15 سنه والمطلوب المرادي كلية وكبد لولد صغير في لندن واهله هيدفعوا فلوس كتير .. كتير اوي

عاصم : طيب هاتهالي يلا (تدخل الضحية)

عاصم : بطل رعدة الايد دي .. اللي على الترابيزة ده مش بني آدم، ده شنطة فلوس مش قولت ان الكلية دي مطلوبة في لندن ولازم نخلص قبل الفجر. اخلص بقا علشان عندي مشوار مهم

غريب : يا دكتور.. البنت لسه صغيرة.. وشكلها مش من الشارع، دي لابسة غالي

عاصم : مشكلتك إنك لسه عندك رفاهية الإحساس في الشغلانة دي الجسم مجرد خريطة وأنا هنا عشان أرسم الطريق للفلوس يالا متخافش لسه قلبك خفيف يا شهاب

غريب : هو انت مبتخافش من الموت يا دكتور

عاصم : عارف يا واد؟ أنا الموت بيخاف مني.. أنا اللي بقرر مين يعيش بعضو جديد، ومين يموت عشان غيره يعيش .. اي ده !!

غريب : في اي يا دكتور ؟

عاصم : السلسلة دي انا عارفها كويس اوي .. سارة؟ دي بنتي يا كلاب .. ملقتوش إلا بنتي تخطفوها وتقتلوها لا .. لا يا سارة.. ده أنا كنت جايك اخذك من النادي .. إنتي إيه اللي جابك هنا؟ قومي يا بنتي دي سارة بنتي يا كلاب انا دبحت بنتي بايدي شغل الاجهزة هات الادريالين سارة مش هتموت سارة مش هتموت بسببي اصحي يا سارة .. أنا دكتور شاطر، هصلح كل حاجة.. هزرعك قلب جديد.. هسرق الدنيا كلها عشانك .. هي بتضحك ليه؟ لا يا سارة لا متروحيش مني ارجوكي (ليحيي) سارة راحت مني .. راحت اللي كنت بعمل علشانها كل حاجة يا دكتور ومن وقتها يا دكتور وانا مبعرفش انام مبقاش يبجلي نوم كل ما انام اشوفها .. اشوفها لابسه فستان ابيض وملامحها احلي بكتير بشوفها واقفه في ارض واسعه وكبيرة وبتبصلي و وشها مليون غضب كل مره يقوم مفزوع لحد ما في مره صحيت لقيت نفسي هنا بس هي قالتلي انها هتيجي وهتاخذني ونمشي انا وهي من هنا تفكر هتيجي يا يحيي

الجميع : قاتل .. قاتل .. قاتل ..

يحيي : سيف باع امه علشان الترند فاتن عاشت وهم الشهرة عاصم بيقتل علشان الفلوس صباح حبسة نفسها لحد ما روح ترجع مرعي مظلوم شايف نفسه ظالم انا مبعقتش عارف مين فينا اللي مجنون يا ليلي العالم بره مليون كتير العلم بره عنبر كبير اوي بس من غير حيطان

ليلي : العالم بره بيلبسوا ماسكات يا يحيي هنا بس الماسكات بتقع وكل حاجة بتبقي واضحه وضوح الشمس نور .. بس نور قوي مش اي حد يقدر يتحملة .. انت بقا خايف منهم ؟ ولا خايف لو دورت جوه نفسك شوية تكتشف انك شبهم

يحيي : شبهم ؟؟ لا انا مش شبهم انا كاتب مؤلف بحكي قصصهم وبكتبها علشان تطلع للنور

ليلي : وانت متأكد انك بتكتبهم بس !! انت بتسرق وجعهم علشان تعمل تريند خاص بيك انت انت بتتشفي فيهم علشان متبقاش فاشل

الجميع : فاشل فاشل

ليلي : بتتشفي فيهم علشان تبان بطل اي الفرق مثلا بينك وبين سيف يا مؤلف ؟ اي الفرق بينك وبيننا ؟

الجميع : اي الفرق بينا وبينك ؟

يحيي : كفايا .. كفايا اوي لحد كده مش قادر اسمع قصص تاتي النهاردة اسكتوا بقولكم اسكتوا خليهم يسكتوا يا ليلي .. خليهم يسكتوا انا مش زيكم بقولكم انا مش زيكم انا غيركم . انا يحيي انا يحيي انا يحيي

اظلام

المشهد الثامن

يحيي قاعد في ركنه يحاول يلزق صفحات كشكوله

ليلي : مالك يا يحيي .. زهقت ولا اي

يحيي : لا انا بس خايف

ليلي : خايف من اي ؟

يحيي : انا خايف الورق يخلص قبل م الحكاوي تخلص ياليلي خايف الحبر ينشف وانا لسه علي الشط

ليلي :الحبر عمره ما يخلص يا يحيي

يحيي : قصدك اي ؟

ليلي : الحبر عمره ما يخلص طول م الوجع لسه موجود وشغال الحبر موجود بص هناك كده

(تشير الي غريب) (تفتح الاضائة ثم نري غريب واقف قدام باب وهمي)

(المرضى يقفون وكأنهم باب بجسمهم)

غريب : (بيخبط علي الهوا) يا اميرة يا ولاد انا جيت .. جبتلكم العشا وجبتلك

الفستان اللي قولتي عليه يا مريم

روح : افتلحه يا ماما

صباح : مريم .. تعالي هنا

روح : بابا بيقولي جابلي الفستان ياماما

صباح : اسمعي الكلام .. قولتلك تعالي هنا

غريب : افتحوا الباب بقا يا ولاد يلا

سيف : (من ورا الحيطه) انت مين احنا مش طالبين دليفري

غريب : دليفري اي يا عاصم انا ابوك افتح يبني بطل هزارك ده وبعدين انتوا قافلين من جوا ليه ؟

بطل هزار بقا الجو برد يبني

صباح: يا استاذ البيت ده ملوش راجل .. صاحبه مات من سنين في قلوبنا روح شوفك رصيف تنام عليه غريب : (يبدأ ينهار ويخبط بجسمه في الحيطه / المرضي) انا موجود انتوا لي بتقولوا كده لا متعملوش فيا كده ارجوكوا .. انا موجود اسمعوني حسوا بيا شموا ريحتي المسوني انا لسه موجود (المرضي بيهجموا عليه في هدوء)

الجميع : محدش هنا البيت فاضي انت هوا (يستمروا في الزق وينضم ليهم اهل بيته بيفضل يزق فيهم لحد ما بيعدي منهم) (بيدخل البيت يلاقيه فاضي ومش بيلقي غير صورة علي الارض) (بيفضل ينده عليهم محدش بيرد - بتنزل اغنية سابوك ف البيت - مسلم)

غريب : انا دخلت البيت لقيت صوري ممسوحه من البرواز لقيت هدومي ف الزباله ملقتش حياتي امهم قوتهم عليا رغم ان عمري ما كنت قاسي عليهم عمري ما زعلتهم ولا حتي في مرة فكرت امد ايدي عليهم ايدي دي اللي كانت دايمًا بتطبطب عليهم وحضني ده حضني اللي كان دايمًا مفتوح ليهم طول الوقت انا اتقتلت انا اتمسحت قبل ما اجي هنا يا مؤلف بس دايمًا سامع صوت فهد ابني في وداني سامعه بيقولي انا جايلك .. جايلك الاسبوع اللي جاي بس بشرط .. الشمس . الشمس اول ما تطلع من الغرب هتلاقيني عندك وانا اهو مستني .. انا مستنيك يبني

يحيي : ازاي .. ازاي بجد . ازاي الواحد ممكن يتمسح وهو لسه بيتنفس

ليلي : الناس مبتقتلش بالرصاص يا يحيي الناس بتقتل بالتجاهل الناس بتقتل بالاستغناء غريب اتعدم وهو ماشي في الصالة بالبليجامة لما لقي نفسه غريب ف بيته لما لقي نفسه مش موجود وسط عياله غريب : علي الاقل كل واحد فاهم قصته ليها ذكرى قصته ليها مشهد نهاية انا بقي مليش حتي مشهد نهاية مع مراتي ولا حتي عيالي

يحيي : متقلقش انا كتبت قصتك ياغريب كتبتها في صفحة .. اه في صفحة اربعين

غريب : (ياخذ منه الكشكول) والصفحة رقم 40 هترجعلي ملامحي هترجعلي اسمي اللي اتمسح من دفتر العيلة انا خلاص مبتقتش موجود يا يحيي انا بقيت مجرد حبر انت بتشخبط بيه ف كشكوكك اتفضل

ليلي : شفت يا يحيي .. اديك شوفت مثلاً فاتن .. ماتت في خيالها علشان تعيش في خيالك انت وغريب .. غريب اتمسح علشان يملي ورقك .. انت كده مش بتقذهم انت كده بتاكلهم علشان تكتب رواية ناجحه

يحيي : لا طبعا انا كنت عاوز اديهم خلود كنت عاوز العالم كله يعرفهم بدل ما هما هنا محبوسين بين اربع حيطان

ليلي : العالم مش عاوز يعرفهم العالم عاوز يتسلي بيهم وانت كنت المهرج اللي بيقدملهم العرض
(الموسيقى تعلقوا وتتحول الي نبض سريع)
(الجميع يلتف حول يحيي في خوف وقلق من يحيي)
صباح : فين روح اللي وعدتني ترجعالي في روايتك
يحيي : انا موعدتكيش بحاجه
المستشار نبيل : فين العدالة اللي قولت انك هتحققها علي الورق
يحيي : انا كنت هعمل كده
جميلة : انا عاوزة الامان اللي انت سرقتة مني
يحيي : انا مسرقتش حاجه
سيف : فين اللايكات اللي هترجعلي كرامتي
يحيي : كرامتك مش هترجع بلايكات
وردة : هتقدر تخليهم يسمعونني يا يحيي
يحيي : صدقيني انا هسمعك
فاتن : اكتبني بطة مش ضحيه
يحيي : انتي رافضه تصدقي الزمن
عاصم : طهرني من دمي اللي وسخ ورقك يا يحيي
يحيي : انت محتاج تطهر نفسك
غريب : رجعلي بيتي اللي اتهد واسمي اللي انتسي
يحيي : انت تستاهل احسن منهم والله
الاسطي عبده : انت ظلمتني زيك زيههم وموفتش بوعدك ليا
يحيي : انا مظلمتكش

الصول مرعي : لي مقولتش ليهم تاني مكنش ليا اي ذنب

يحيي : هقولهم والله هقولهم

(يحيي بيتحاصر تماما بيحضن الكشكول بقوة بيدراي وشه منهم)

(بيشدوا فيه من كل ناحية)

الجميع : احنا مش حبر احنا دم احنا مش ورق احنا وجع اخرج من ورقك اخرج و واجهنا.. انت مجنون
مجنون يا يحيي

يحيي : انا مجنووووووووون

(تدخل عفاف ومعها خشبة تخطب بيها علي المسرح)

(الجميع يعودوا الي اماكنهم معادا يحيي مازال في المنتصف)

عفاف : الزيارة انتهت والمؤلف قرر ينضم للعيلة اهلا بيك في الجحيم الحقيقي يا يحيي اهلا بيك في عنبر

10

اظلام

المشهد التاسع

(ليلي تقف في منتصف المسرح الجميع نائم)

ليلي : انا كنت بشوفه كل يوم يا يحيي كان كل يوم يبجي تحت البيت يقف بالساعات يرفع عينه لشباكي وانا استخبي ورا الستارة قلبي كان هيطلع من ضلوعي ويروحله بس عقلي كان بيقولي اثبتني اتقلي .. اللي بيحب بيستني كنت خايفه احبه طول عمري شايفه الحب ضعف وانا مش ضعيفه .. بس حبيته وعشقه كمان وهو كان بيحبني اوي كان بيبان علي وشه وملامحه كانت عينه بتنور اول ما يشوفني وانا كنت بنت ثقيلة وراسية كنت بستني كتير علشان اقله كلمه حلوة كنت بستني كتير

يحيي : (يقترب منها) وليه استنيتي كتير اوي كده يا ليلي .. ليه سبتيه يحرق عمره علشان مستني منك كلمة حلوة مستني منك الاهتمام والمعاملة الكويسة

ليلي : كنت خايفه..خايفه يشوف لهفتي عليه يشوفني ضعيفة كنت فاكدة ان الحب معركة واللي بيبين مشاعره الاول هو اللي بيخسر .. ومات يا يحيي .. مات وهو فاكر اني حجر مبجشش بيه مات وهو شاكك اني حبيته اصلا وانا محبتش قده

يحيي : (في شخصية حبيبها) (يمد يده بيقومها من الارض) كنتي بتستخبي ليه يا ليلي انا وقفت تحت بيتك في عز مطر الشتا لحد ما عضمي اتجمد كنت محتاج منك بس اشارة .. نظرة رضا .. كلمة خليك حتي

ليلي : ادم ؟ انت رجعت (تتحول ملامحها للبرود المعتاد) انت ايه اللي جابك ها ايه اللي جابك بقا دلوقتي مش مشيت وسبتني يلا امشي

يحيي : خلاص يا ليلي .. دلوقتي جه وقت اني اقولك سلام لآخر مرة .. انا ماشي ومش هقف تحت شباكك تاني عندك كلمة اخيره تقوليها؟؟ ولا هيفضل التقل اسلوب حياتك .. سلام يا ليلي

ليلي : ادم استني (تجري ترتمي في حضنه) لأ انا مش هخاف تاني مش هخاف من لهفتي عليك مش هخاف اقولك اني بحبك انا كنت بموت في كل ثانيه ببعد فيها عنك انا كنت برسم وشك علي الحيطان كنت بكلم صورتك لحد الصبح انا بحبك اوي بحبك ومش خايفه المره دي حتي لو هتشوفني ضعيفة او مدلوقة عليك .. اللي بيحب مبيخافش . انا ضعت من غيرك ضعت واتبهدلت من غيرك شوف انا بقيت فين .. بص شكلي بقا عامل ازاي يا ادم ادم .. ادم انت فين .. ادم كان هنا دلوقتي يا يحيي انا كنت في حضنه دلوقتي

يحيي : علشان كده طول الوقت ده كنتي جمبي كنتي بتفهميني كل واحد من دول جواه ايه قررتي متبقيش ثقيلة معايا وكألك بتعوضيني عن اللي ادم كان محتاجك لعمله معاه للاسف مش قادر اشوفك

مبرر او يمكن علشان انتي اللي كنتي بتوجديلي مبررات لكل واحد فيهم علشان عارفة انك ملكيش مبرر
علي اللي عملتيه كان نفسي اعرف رده هيكون ايه لو بيسمع كلامك دلوقتي اكيد كان هيفرح فرحه م
فرحهاش في حياته كلها

ليلي : هو مردش لانه كان ميت كان في مغسلة انا قولتله الكلام ده بس قولته وهو جئه يا يحيي .. كنت
بصرخ في ودنه واقوله ارجعلي وهو ف كفن كان ريحه المسك مالي المكان وصوت القرآن كان عالي
وهو مسمعنش (للجمهور) اغلطوا .. اتدلخوا قولوا للي بتحبوهم انكوا فعلا بتحبوهم قبل ما يمشوا ..
اتهانوا في الحب لان الحب عمره ما كان اهانه طالما بنحب ومتأكدين اننا بنتحب بس متموتوش ومعاكوا
مشاعر مطلعتش متموتوش وانتوا حاسين حاجه وعاوزين تقولوها الندم علي اللهفة اقوي واهون مليون
مرة من الندم علي التقل

يحيي : فوقتي يا ليلي .. بس فوقتي متأخر اوي فوقتي بعد فوات الاوان

(يدخل خالد والمرضه عفاف ومعهم ملف كبير)

يحيي : خالد عامل اي طمني عليك .. انا خلاص خلصتها يا خالد الرواية كملت ليلي حكلي كل حاجه
وصباح وعنده وسيف و كلهم كلهم يا خالد اتكلموا وجمعت القصص كلها جمعت قصص عنبر 10 كله
في 3 اسابيع بس وكلهم هنا في الكشكول ده

خالد : يحيي .. 3 اسابيع ايه؟! يحيي انت بقالك هنا 3 سنين

يحيي : (يضحك) ياجدع .. 3 سنين اي بقولك 3 اسابيع انا دخلت هنا معايشة علشان اكتب الرواية انت
نسيت ولا ايه .. ده انت اللي رشحتلي المكان ده علشان اكتب في روايتي الجديدة اللي هنزل بيها السوق
وهتكسر الدنيا

خالد : (يفتح الملف الطبي ويقرأ منه للجمهور) يحيي .. كاتب مغمور مريض بانفصام حاد وتأنيب
ضمير قهري .. تسبب في وفاة خطيبته (ليلي) في حادث سير بعد ما رفض ينزل من البيت يصلحها
وهي كانت مستنيه تحت مطر الشتا فضل يتقل عليها وهي بتموت من اللهفة عليه لحد ما عرييه خبطتها
قدام عينه وهو باصص عليها من ورا الستارة

يحيي : كذب .. انا مكنتش ورا الستارة انا كنت بكتب

عفاف : بتكتب اي وريني كده .. الصحف كلها فاضية اهي يا يحيي الصفح فاضية ومفيهاش غير كلمة
واحد بس

عفاف ويحيي : انا اسف

المستشار نبيل : انت اللي قتلت ليلي ببرودك

صباح : انت اللي حبستنا في خيالك

سيف : انت اللي قررت تهرب من صورتك في المراية

ورد: لو كنت سمعتها مكنتش ماتت

فاتن : انت مش مؤلف انت كومبارس في روايتنا

جميلة : انت السبب في كل حاجه حصلت

غريب : لو كنت فتحتلي الباب كان زماني في بيتي

نبيل : مكانش لازم تكون موجود من الاول

عبده : انت اكبر ظالم موجود وسطينا

عاصم : انت اللي خلتنى ابقى جشع

عبده : مكنش لازم اسمع كلامك

(المرضى بيلفوا حواليه بيكرروا كلمة واحدة)

عفاف : رد عليهم يا يحيي هترد عليهم تقول اي ؟

الجميع : انا اسف انا اسف انا اسف

يحيي : (بانهيـار) انا مكنش قصدي ... مكنتش اقصد خالص اتقل عليها كنت فاكـر انها هتفضل مستنيه
كنت فاكـر ان الحب مبيخلصش ! ليلي .. ردي عليا يا ليلي انتي كنتي هنا .. ليلي انتي فين .. ليلي

ليلي : (من وسط الجمهور في اخرالصالة) اتأخرت اوي يا يحيي فوقت بس فوقت متأخر فوقت بعد
ما فات الاوان (تغادر) اتأخرت يا يحيي وانا مبقتش بستني

يحيي : ليلي .. تعالي يا ليلي انا مش مجنون ليلي كانت هناك ياخالد ليلي كانت هنا

خالد يعطيه حقه مهدئة ببطئ يحيي بيستسلم القلم بيقع من ايده بينزل علي الارض وهو ينادي علي ليلي

ليلي : نام .. نام يا يحيي روايتك مفيش حد هيقرأها

انت كتبتها بالدموع مش بالحبر نام يا يحيي

الجميع يغادر يظل يحيي في المنتصف حتي تأتي ليلي من خلفه تضمه لحضنها

النهاية